



Taulogologo

TOMANATUGA FAALEAGAGA MO LE MASINA O
SETEMA 2022.

SETEMA 2022

Tusi Faitau: Kalatia 1:11-17

Matua: Kalatia 1:12

Ua ta i tua Apolima e pei ole tala i le alii sau o Tupuivao. A'o lele ua tuta i Nu'u matagofie le sa ole tatou Kapelenisia. Sa tatou folau mai fa'a-va'a lealea i peau sou ma peau fatio'o, ma sa taumate i le 'ete pe tua ma ni a le folauga i lena masina ua mou atu. Peita'i ua finagalo malie le Mata'isau o le foafoaga, e momoli saogalemuina mai lo outou soifua ma so matou nei ola, i lenei fo'i masina lona 9 ole tausaga. Ia i le Atua poto lona lava viiga nei ma aso uma lava.

E toe ofo alofa atu ai foi ma faatalofa atu i le Paia ma mamalu maualuga ole tatou Kapelenisia mai lava i ona mauga maualuluga, seia oo lava i nai fanau iti. E le faagaloina foi nai a tatou pa'aga aemaise o uo ma aiga aemaise le au faitau o le tatou auaunaga masani lenei "O le TAULOGOLOGO" Ae o se Tomanatuga faaleagaga fo'i lenei mo i tatou mo lenei masina o Setema.

Fai mai le tatou Matua mai le fuaiupu e 12 ole tatou Tusi Faitau " Auā e le'i maua lea e a'u mai le tagata, e le'i a'oa'oina ai fo'i a'u, ua na ole fa'aliga a Iesu Keriso na ou maua ai."

E i ai ni isi lagona e lē tau o'a'oina, ae tutupu. E mafai 'ona mafua lea tulaga, ona o lo tatou siosiomaga. Auā o nisi mea e tutupu i aso ta'itasi, o lo'o afifi ai ni itū taūa, e mafai ona faatupu manatu, mo le toe fuataina.

Sa le'i aganoa le salalau ole Talalelei, ma ni a'afiaga i le olaga o nisi tagata. E le gata o'i latou na fa'aolatotoga i la latou matau le manumalo o Keriso, ae sa faapea fo'i i e na tigā o latou loto, ona o le tupu a'e ole potopotoga o ē na talitonu i le Alii. Ona tatou iloa ai lea, e le'i oge le ulua'i Ekalesia ma ni fili matautia. O se vaega lea o le pogai, na tusi ai Paulo i le Ekalesia i Kalatia.

Auā o lea ua mautala, e i ai ni isi ua tautoa'i lo latou fa'atuatua. O nisi ua peisea'i ole a fulitua ma solomuli, i ala o le pogisa. A o nisi, peisea'i ua manatu

ole ekalesia ma le lē ekalesia, o se mea lava e tasi. Peisea'i ole fa'anaunauga ole Aposetolo, o loo faasaga i itu nei.

1). E LE O SE MEA FAALELALOLAGI, LE FA'AOLATAGA:

Auā e le fetautuana'i malosi. E iloa e Paulo le malosi faafitafita. Sa tua fo'i lana amio i le malosi o upufai. Na na tofo ile fa'asaua ma le lima tetē. O lona tomali ile a'upega e le fa'atusalia. O lona poto ma le atamai ile vaogagana e maoa'e lava lea. O itu na sa tua i ai lona ita tele i le Alii, ma i latou na fa'atuatua i lona manumalo. A'o lea ua liua le vai o Sina. Ua sui le itu na te tu ai. Ua uma lona tau punipuni, a'o lea ua na tala'i atili. Ua uma fo'i lona ita, a ua Alofa. Sa malosi Paulo (ina o Saulo) a'o lea ua atili malosi ina ua talitonu ia Iesu.

2). E ILOA SUIGA I LE AMIO, A SE TASI UA LILIU E LE ALII:

Ou te manatua i Aso la a'o o'u A'oga a le Faifeau. Sa fa'amatala ai e le matou faiaoga e fa'apea, sa masani ona fa'aoga le ma'a mafolafola e tusi ai mataupu. A uma le mataupu ona faapea lea, "fa'amama le ma'a" ole faatonuga fo'i lea e iloa ai e le vasega, ua uma le Tala i le Tusi Paia, ae ole a soso'o ma le Gagana Samoa. Ma e leai se tama poo se teine atamai, na te toe tusi le mataupu fou, i luga ole mataupu ua uma ona togi. Pe a na leai Vero, po'o fa'apenei ou te le o Katoliko..

Ole atugaluga o le Aposetolo, ina ne'i na 'ona ta'ua le Ekalesia i Kalatia, ae amio lava i le olaga tuai. E i ai le faaeteetega ina ne'i na ona taulagi le suafa o Keriso, ae fai lava le mea e loto i ai le tagata. E sili i le manatu o Paulo, le tagata e fa'atuatua ma fa'atino mai, i le amio lelei ma le faapaiaina.

3). E I AI LE MANULAUTI, O LE OLAGA KERISIANO:

Na mataalia le au Aposetolo, ae le tau ina faatoatele, ni isi latou te nonofo. E le o lo latou faamoemoe fo'i, ia tau 'ina anoanoa'i la latou potopotoga. E le'i i ai fo'i so latou manatu, ia tau ina iloa, ona lava lea.

TOMANATUGA FAALEAGAGA MO LE MASINA O SETEMA 2022.

Sa a'ua'u le faamoemoe, ina ia alualu le fa'aolataga. E pei lava ole muagagana i le malaia; "O le aloiafi, e tupu ai le mu." E ataata mai, ole faamalosi o ulua'i so'o, ole puna lena na faainumia ai le Nu'u, e o'o lava i tagata uma. E a'oa'o mai ina ia tatou lagona, e i ai le valaaulia o le tagata talitonu. O se tasi fo'i ua fa'atuatua ia Iesu Keriso, e ao ina molimau i lona lava fa'aolataga. Manatua fo'i, po'o le a le tele o mea e iloa e se tasi, ae a le faaalua (i lona olaga) e le iloa lava e ni isi na te iloa se mea. Manatua, o se isi lea uiga ole satauro o Keriso, ina ia e tepa a'e i luga ma e vaai loa ma malamalama, i le mafua'aga o lou fa'aolataga. E te le tau autilo i lalo. E te le tau fa'avasegaina fo'i, auā e tutasi lava ma tupito le fa'aolataga na faia e

Keriso mo i tatou. E tasi lava le va'ai a le tagata ua salamō faamaoni ona ia iloa lea. Se'i vanaga fo'i le tagata loto fatu ma ma'a'a le loto, ona faataliga tuli lea o lona loto malosi. Tilotilo i luga ma sōsō mai i luma.

"Auā e le'i maua lea e a'u mai i le tagata, e lei a'oa'oina ai fo'i a'u, ua na o le fa'aaliga a Iesu Keriso na ou maua ai."

Manuia tele ona o Keriso

Amene

Vauei & Veronica Tuitolova'a
(FK)

AFIGA CARDINAL JOHN DEW



18 Aukuso 2022

Ma Fa'amanuiaga Uma mo Outou.

E fa'atalofa atu ia te outou uma mai Roma le nofoaga mo nai aso ua mavae sa ou 'au ai i se sauniga sa fa'au'uina ai e Pope Faranisisi ni Katinale fou e 20, ma se fonotaga sa feiloa'i ai Katinale ale lalolagi. O nei fonotaga sa fa'aautū i tusitusiga a Pope Faranisisi na fa'asalalauina i nai masina ua tuana'i sa ta'ua *Praedicate Evangelium* – "Tala'i le Evagelia". Sa lē faigofie i nai aso ua tuana'i, ae i se agaga o le "mafutaga" ma le "fegalegalea'i" sa matou taumafai ai e iloatino o matou ala aga'i i luma ina ia mafai e le Kuria Roma ona ola moni ai le galuega na tu'uina e Iesu i so'o uma e "tala'i le Evagelia."

O lenei fa'atasiga na fa'a'autū i le matafaioi a le Kuria Roma, ma ua manino mai ai le va'aiga a Pope Faranisisi o le tasi lenei o galuega na tofia ai o ia e fai. O lo'o i lona agaga le va'aiga a le Ekalesia na miti i ai le Fonotaga a le Vatikano Lua i le 60 tausaga talu ai. O iā ia le loto tele ma le atamai, ma le mafana atoatoa ma le fa'atuatua o lo'o ta'ita'ia i tatou e le Agaga Pa'ia i nei aso.

E tele lava mea e ao ona mafaufau i ai ma tomanatu ai i nei aso. O nisi ua ou mafaufau i ai o le vaega ua fesiligia ai le Kuria Roma ua fesiligia ai i tatou ta'ito'atasi, po o le a lava lo tatou tulaga i le Ekalesia...o se suli o le Palisi po o le Komiti o Sauniga, o se faia'oga i a'oga Katoliko, se isi o lo'o faia polokalame fa'asakalameta...o a'u o le Epikopo a le Pule'aga. O tatou uma e iai la tatou matafaioi e ala i le Papitisoga. *Praedicate Evangelium - Tala'i le Evagelia* ua tautala mai iā i tatou uma:"fa'avae i luga o la latou feiloa'iga ma Iesu Keriso, o suli o le Kuria Roma (**ma tatou ta'ito'atasi**) e tauaveaina la latou galuega i le maitauina fiafia o latou o ni so'o fa'amisionare o lo'o 'au'auna atu i tagata uma a le Atua".

O le ā se mea tatou te mafai ona faia? O le mea tatou te faia o le fesoasoani atu i isi e feiloa'i atu iā Iesu o ia o le Ala, le Moni ma le Ola?

Fa'atasi ai ma le fa'afetai tele mo a outou tatalo ma le tapua'iga i na aso.

Nāku noa. Nā

+ John

IN HOC SIGNO VINCES – I LENEI FA’AILOGA O LE A E MANUMALŌ

Le Atua e, o lou finagalo lava, ina ua si’i a’e lou Alo i luga ole Koluse, o lou Tinā e tatau ona tū latalata ifo i ai ma fa’asoa i ona puapuagā, aumai ina ia ‘au ai lau Ekalesia ma le Taupou o Maria i puapuagā o Keriso, ina ia aogā se fa’asoa i lona Toetū. Ia soifua ma pule fa’atasi ai ma le Agaga Pa’ia, le Atua e fa’avavau, fa’avavau lava. Le Tinā o Fa’anoanoaga, Talosia i matou.

Aso 14 Setema – Fa’aeaina ole Koluse

Aso 15 Setema – Le Tinā o Fa’anoanoaga.

O le Aso 14 o Setema o le Sulufaga o le Fa’aeaina o le Koluse ma o le Aso 15 o Setema, o le Fa’amanatuga o lo Tatou Tinā o Fa’anoanoaga. I le taua o le Auala laupapa i Milvian (Milvian Bridge), o Kosetatino o se fa’apaupau sa talitonu e tasi le atua na tapua’i i ai o le atua o le lā o Sol Invictus, ma o ana vaega’au sa va’aia se koluse o le malamalama i le lagi i luga a’e o le lā ma upu i le gagana Eleni na fa’aliliuina i le Latina – Loc Signo Vinces (i lenei fa’aaliga ia manumalō). I lenā lava po sa faia ai se miti a Kosetatino e fa’apea na fa’atonuina o ia e Keriso e fa’aogā le fa’aaliga o le Koluse i ona fili. Sa tusia e Kosetatino le āta o le Koluse i luma o talitā a ona fitafita ma na maoa’e le manumalō a Kosetatino i lea taua ma na ia ta’ua ai le Atua a Kerisiano. Ona o lenā mafua’aga na avea ai Kosetatino ma Kerisiano ma ona o ia o le tupu o le Malo o Roma na ia fa’amuta ai le 300 tausaga o le sauāina o Kerisiano e Roma i le tausaga 313 AD e ala i le fa’atonuga a Milan na aloa’ia ai ona avea le Fa’akerisiano ma tapua’iga a le Malō a Roma.

O sagata Elena, lona tinā, o se fafine e malosi le fa’atuatua ma sa malaga atu i le Nu’u Pa’ia ma fausia ni malumalu i vaega pa’ia e pei o le nofoaga na fanau ai Iesu i Petele’ema ma le vaega o le fa’akoluseina. Sa ia toe maua maia ni vaega o le Koluse mai le nofoaga sa natia ai ma sa fa’aaloogia i Ieruselema mo le 300 tausaga. I le tausaga 600 AD, ina ua ave’eseina le koluse mai lona nofoaga e le au Peresia, sa toe maua mai e le Tupu o Heraclius le Koluse ma avatu ai loa i Roma. O le sulufaga o le Fa’aeaeaina ole Koluse na fa’avaeina ai le fa’amanatuina o lenei mea na tupu. I nei tala ole tinā ma lana tama na toe fa’atasia e ala i le la fa’atuatua i le Koluse.

3

O le fa’amanatuga o le Tama’ita’i o le Fa’anoanoaga ua mulimuli mai ai ona o la Tatou Tinā Pa’ia ua toe fa’atasia ma Keriso i lona olaga i le lalolagi nei, i ona puapuagatia i luga o le Koluse, ma o lenei ua fa’atasi ma ia i le lagi. O nei sulufaga e lua ua aumaia iā i tatou se lesona i le fa’atuatua, fa’amoemoe, ma le alofa e ala ile koluse. E tatau ona iā i tatou le fa’atuatua ona o tagata uma lava e puapuagatia i lenei olaga.

E tatau ona tatou taumafai e fa’ata’ita’i i le fa’atuatua a Maria ma tu’u fa’atasi o tatou puapuagatia i puapuagatia a Keriso. I lenā faiga ua si’itia fa’atasi ai i tatou ma ia, e pei ona fai mai ai Sagato Paulo i le tusi i Roma: *Auā o lo’u manatu e lē tatau ona fa’atusaina le tigā i nei ona po ma le manuia atalī e fa’aalia mai iā te i tatou* (Roma 8: 18).

Ole fa’atuatua e ta’ita’ia e le fa’amoemoe, ona ua tatou iloaina o Keriso na manumalō i ona puapuaga i luga ole koluse, i lona toetu mai i le aso tolu, ma: O le upu moni lenei: *Pe afai tatou te oti fa’atasi ma ia, tatou te ola fa’atasi ai fo’i* (2 Timoteo 2: 11).

O LE PESE A LE ‘AU’AUNA – (FA’AAUAU MAI LE LOMIGA TALU AI) O LE SOSOLAGA I AIKUPITO

‘O le agelu a le Ali’i ua fa’aali mai iā Iosefa i le miti, ua fa’apea mai, “Tula’i ia, inā ave le tamaitiiti ma lona tinā, ma sosola i Aikupito, ma nonofo ai se’ia ou fai atu iā te ‘oe; auā o lo’o sa’ili Herota i le tama itiiti ina ia fasioti iā te ia.” Ua tula’i ia, ua ave le tama itiiti ma lona tinā i le po, ona o atu lea i Aikupito. Sa i ai fo’i o ia ua o’o ina oti o Herota; ina ia taunu’u ai le afioga a le Ali’i i le perofeta, ua fa’apea mai, “*Na ou vala’auina lo’u atali’i ai Aikupito.*”

Ua iloa e Herota ua olegia o ia e makoi, ona tele ai lea o lona ita, ua ‘a’auina atu e ia nisi e fasioti i tama tane uma i Peteleema e o’o i ona tuaoi uma, e afua i ē ua lua o latou tausaga atoa ma ē ua pito

ane i ai, e fa'atatau i ona po na na matuā su'eina atu ai i makoi. Ona taunu'u lea o le upu a le perofeta o Ieremia, ua fa'apea mai, *Ua lagona le leo i Rama, o le auega, o le fetagisi, ma le tagitu'i tele; ua tagiauē Rasela i lana fanau, e lē mafai fo'i ona fa'anāina o ia, ona o i latou ua leai.* (Mataio 2: 13 – 18).

Ina ua tatau ona sosola Maria ma Iosefa i Aikupito ina ia fa'asao le ola o le tamaitiiti i le fa'aanu'ua, ua taunu'u le perofetaga a Simeona. O le tasi e mamā, le tasi e pa'ia, ua avea ma fa'aailoga o le fete'ena'iga. Ona o tagata ua malaga mamao mai e sa'ili iā te ia, e olioli fa'atasi ma ia ma ofoina atu i latou e 'au'auna atu i ai. O Herota, le tupu o Iutaia, na taumafai e fasioti iā te ia ma na avea o ia ma se tasi na fasiotia le to'atele o tamaiti.

O se tausiga mamana fa'apitoa na puipui i le tama itiiti ma lona tinā, ma o Iosefo na filifilia e avea ma fa'aailoga va'aia o lenei puipuiga.

O le Aiga Pa'ia ua toe olaina le tala'aga o le fa'aolataga o se tala'aga o le esoto ma le fa'asa'olotoina. O Iosefo, o le pateliaka, na fa'atauina e ona uso ma avatu o se pologa i Aikupito e avea ma fa'aolataga o ona uso. O le pateliaka o Iakopo na alu atu i Aikupito, ma Mose ma tagata na puapuagatia ona o sauga se'ia fa'asa'olotoina i latou e le Ali'i mai le nu'u o le pologa.

Na ala i le perofeta o Hosea, ua vala'au le Atua i ona tagata, **i o latou atali'i**, ona i le fa'asa'olotoina o Isaraelu na gaiio le Atua o se Tamā. 'O ona po na tama itiiti ai Isaraelu, na ou alofa atu iā te ia, na ou vala'auina fo'i lo'u atali'i nai Aikupito' (Hosea 11: 1). O nei mea uma na fa'ataunu'uina iā Iesu, fa'atasi ai ma Iosefo ma lona tinā na sosola i Aikupito ma fa'alogoina le gaiioiga fa'aola a le Tamā. O ia o le Alo fa'apelepeleina, ae na ia puapuagatia fa'atasi ma latou ua mafatia, leai ni aiga, ma latou ua fa'asauaina.

I taimi o tatou olaga, ua tatou va'aia le miliona o tagata i isi vaega o le laolagi ua ave'eseina mai o latou atunu'u. Miliona o isi o ni tagata faimalaga ua sa'ili mo ni galuega ma se fasi falaoa. E leai se tusi ua maua uma i ai puapuagatia ma le fa'alumaina na tauaveaina e i latou. Ia latou manatuaina le mea na o'o i ai Iosefo ma Maria ma Iesu i Aikupito. Ia latou liliu atu

iā Maria i o latou mana'oga, ma lagona le alofa o le Tamā i le lagi. Afai na tauave e Iesu lenei malaga 'ese atu, o isi e lē tatau ona fuaina e leai sona uiga. Ae ua tatou fa'amamaluina le Aiga Pa'ia na sosola atu i Aikupito, ae ma'imaue pe ana tatou alolofa atu iā i latou ua leai ni aiga, fa'atasi ai ma le miliona o tagata ua aumau i nofoaga fai tele po ua natia o latou fa'asinomaga ona e leai se isi e mana'o iā i latou.

E lē o ta'uina mai e le Tusi Pa'ia pe na iloaina e Maria le fasiotia o tagata i Petele'ema, ae o le manatu i se avanoa sa iā Maria ma Iosefo i le taimi sa i ai i Aikupito. Ina ua toe fo'i i le nu'u o Kalilaia, sa latou fa'alogoina ai e uiga i lenei mea na tupu fa'apea isi solitulafono a Herota; se anoanoa'i o lona agalofa ma le puapuagā o lona loto imakulata. Ioe o le perofetaga a Simeona ua tumau ma ia e fa'avavau.

Le Atua pa'ia e, o ou ala e matagofie; o lou atamai ua sili atu i o matou mafaufauga uma.

Matou te fa'afetai atu ia te oe ona e ala i puapuagā a Iesu,

ua e aumaia le fa'aolataga mo puapuaga mata'utia

O latou ua fa'asauaina, soli palaina ma leai ni aiga.

Matou te tatalo mo latou ina ia aua ne'i puapuagatia le aogā ma ia lagonaina lo latou tagi.

Maria e, matou te tatalo atu ia te oe, le Tinā o le Fesoasoani e lē uma.

Ia a'oa'o mai i le au talitonu uma mai lou agalelei;

ia fa'aaloalo ta'ita'i uma o malō i le Atua, le Tamā e To'atasi,

i se manatu tele mo latou ua te'ena, ta'ito'atasi ma leai ni aiga.

Tatalo mo matou ina ia matou a'oa'o lou agalelei, ma tu'u

fa'atasia a matou gaiioiga i le 'au'aunaga iā i latou o lo'o tele le mana'omia.

Amene.

O Le Ala a le Atali'i Fa'amaumau'oa.

(Faitau Luka 15: 11 – 32) – tu'u atu le avanoa ia outou le au faitau e faitau ai le tala.

O le va'aiga fa'avae a le Tamā e 'ese.

Se'i o tatou manatu mo se minute ma tomanatu po'o ai lenei uso matua i le fa'ata'oto ma o ai nei uso matutua ia tatou palisi. Amata i le manatu po ofea sa sau mai ai le uso matua ina ua ia fesiligia le 'au'auna po'o le a le mea lea e tupu. Na sau mai le fa'ato'aga. Sa galue o ia. Ua tatou iloaina o le uso matua e fa'amaoni i ana tiute. E le'i tu'ua e ia le aiga, sa mulumulita'i i tulafono uma. O le mea moni ua matuā lē fiafia i le tali a lona tamā i le atali'i fa'amaumau'oa na fai atu ai i lona tamā o ia fo'i sa galue e pei o se pologa. E manino lelei o ia e galue malosi, e tu'utō, ma fa'amaoni. O ni mea matagofie uma nei.

Ae a tatou va'ava'ai i lalo ifo i upu a le uso matua, ua tatou va'aia mea o lo'o i totonu o lona loto. I lalo ifo o lona usita'i fa'atiute o lo'o ta'oto ai le loto tigā, fa'ali'i ma le inoino. O le mea lenā na lē taofiofia ai ina ua ia iloaina ua fasi e le tamā le povi po'a ma ua faia se fiafia fa'amanatu ai lona uso. Sa galue fa'amaoni mo lona tamā, ae le'i lagonaina lava sa taliaina se mea e tau'i mai ai. E lē o se manatu lenei a se atali'i ae o se manatu a se 'au'auna po'o se pologa. O le fa'afitauli autū lenei mo le uso matua: **na te lē o iloaina o ai ia!**

O le mea lea ina ua 'ai'oi atu le tamā i le uso matua, o lo'o taumafai o ia e toe fa'afo'i mai le fa'asinomaga a lona atali'i i se auala e 'ese mai le auala na ia faia ai le atali'i fa'amaumau'oa ae o le mataupu fa'avae lava e tasi. O le atali'i famaumau'oa ma le atali'i matua e a'afia uma i la'ua i faiga fa'a-fa'asinomaga. O lo'o gaiou ma ola ai i se gaioiga e lē masani ai o ai i la'ua.

Na fa'aogaina e le tamā ni ofu talaloa ma mama, o fa'aailoga o aiga, e fa'aילו atu ai i le atalai'i fa'amaumau'oa o ai ia ma toe fa'afo'i mai o ia. A o 'ai'oi atu i le uso matua, o lo'o taumafai fo'i e fa'amausalī lona fa'asinomaga: "O oe o lo'u atali'i. O mea uma o au ia. O le a le uiga ou te le'i avatua ia oe se auro, pe fasi le tama'i povi peti mo oe ma au uō? O 'oe a ana auro ma tama'i povi. O mea uma ia a 'oe. E te lē malamalama? E lē o 'oe o se pologa! O 'oe o lo'u atali'i!"

Ua tatou fa'alogo i lenei fe'au i le Tusi Pa'ia atoa, aemaise le Tusi a Paulo i Roma: "Auā ua outou lē maua le agaga, e toe fefe ai; a ua outou

maua le Agaga o tamafai, tou te vala'au atu ai," Ava, le Tamā e!" (Roma 8: 15). O lo'o talanoa mai fo'i Paulo i le fa'asa'olotoina mai le pologa a le agasala, ma o lenei fa'atusa o lo'o fa'aleo mai ai tagata o le lalolagi anamua. I na taimi, o le i ai o sau pologa po'o oe o se pologa. E fa'apea fo'i, o au 'oa e mafai ona suia. Afai, mo se fa'ata'ita'iga, e te le'i totogiina au aitalafu, e mafai ona fa'atauina oe o se pologa.

O le tamā o aiga nei i taimi o Paulo. Ae sa fa'aalu se taimi tele e fa'aילו atu ai i le lalolagi ua uma ona fa'atauina ma toe totogi. O Iesu na totogiina a tatou aitalafu, e lē o se mea e pala, e pei o se siliva po'o se 'auro, ae o lona lava tino ma lona toto. Ae le'i uma ai i'ina, e ui i lea, e le'i na ona fa'asa'olotoina i tatou e Iesu, ae na ia fa'aulufaleina atu i tatou i se aiga. E lē na o se aiga, ae o le aiga a le Tupu.

Ma na alualu lelei. Na vaetamaina i tatou, ma o le Tupu na folafolaina mai iā i tatou o le a tatou talia se tofi. Mo lenei tatou te lē mana'omia ona fa'atali, ona ua ia faia se totogi mo lenei tofi i le auina mai o lona Agaga Paia ina ia tatou iloaina ai o tatou o ni atali'i ma afafine moni, ae lē o ni pologa.

Ae i le Ekalesia i aso nei, atonu o lo'o i ai pea le tele o pologa: o le au fa'atuatua o lo'o galulue punoua'i i fa'atonuga ua tu'uina atu iā i latou e le Ekalesia. Atonu e le'i te'ea lava se fa'atonuga e tasi. Ua latou "galulue i le fa'ato'aga" ona o le tiute, e lē malamalama i o latou fa'asinomaga. Ona lē fiafia ai lea ma gaule punoua'i pe a tatou amata ona fa'amanatuina le toe fo'i mai o le atali'i fa'amaumau'oa.

O le au fa'atuatua nei ua lē iloaina o latou o atali'i ma afafine e lē ona o a latou amioga lelei po'o talitonuga sa'o ae ona o le natura taufa'aleaga o le alofa ma le kalasia a le Atua. O lenā alofa ma le kalasia ua fofola atu i o latou luma ma le mata'utia i le fa'amanatuina o fa'amaumau'oa e lē aogā ua toe fo'i mai ia i tatou.

E malamalamaina lelei i o tatou loto tigā. O le alofa a le Atua e lē tonu. E lē talafeagai mai le va'aiga a le tagata. Ae ui i lea, o le manatu ma le loto lenei a le Atua. Afai o la tatou Ekalesia e fa'afou i tulaga uma lava, o le alofa e tatau ona fa'atumulia uma ai o tatou fa'avae ma faiga.

E lē mafai e le Ekalesia ona na ona fa'ate'a i tua le ita ma le tigā o a tatou uso matutua. E mana'omia ona tatou alolofa atu i ai, ma e pei o le tamā

TOE FA'AFUUGA MAMANA

a le atali'i fa'amaumau'oa sa alofa i le uso matua. E tatau ona tatou 'ai'oi atu iā i latou e 'au ai i le fiafia, ina ia maitauina ma fa'amanatu le vavega o le toe fo'i mai o latou na leiloa ma ua toe mauaina.

Sa Tausisi Lava mo se Fiafia

E ui e moni e i ai lava le loto a le tamā mo le uso matua, e tatau lava ona fa'aalu le fiafia. O le 'auga lenesi: e lē toe fo'i i tua le tamā mai lenesi ki tāua. O le povi peti ua fasia ma o le auaiiga atoa o le a au ai i le fiafia.

O le tala patino o lenesi fa'ataoto e mafua mai le tulaga tatou te leiloaina pe fa'apefea ona i'u. Tatou te lē iloaina pe na 'au atu le uso matua i le fiafia pe na masau 'ese atu ma le ita tele.

Sa faia se fa'atalanoaga o lenesi fa'ataoto i se fa'apotopotoga a se palisi ma sa fa'amatala ai e pei ona ta'ua i luga. Sa tali mai se tasi o ali'i sa i ai e fa'apea, e 'ese le mea lea ou te iloaina ona ou te iloa pe na fa'apefea ona i'u le tala. Ina ua fai atu e fa'amatala mai, sa ia tali mai, "O le uso matua na fasiotia lona ia lava tamā."

Ia e foliga mai ua suia ma fa'ate'ia le i'uga ae o le au tusi upu ma le au Farasaio na fasiotia Iesu. Mai se va'aiga i luma atu, o ta'ita'i fa'alelotu i aso o Iesu sa i ai so latou sao i le maliu o Iesu ona sa ia tele ona mafuta atu i le au aolafoga ma tagata agasala i lo le fa'amaonia ma fa'amausalīina le au fa'atuatua.

So'o se fa'atulagaga fa'alelotu o lo'o ta'oto ai lava le avanoa mo latou e manatu fa'apito ia i latou lava aemaise i latou ua manatu ia faia lelei i latou ae le'i foa'ina mai e le Atua lona alofa. Fa'aopopo i ai le talitonuga e talia i tatou e le Atua e ala i galuega lelei, amioga, ma le usita'i, ona i ai uma lea o vaega mo tulaga ua i ai nei: ua tatou talitonu lava o tatou ua amio lelei.

O se Ekalesia ua lē malamalama lelei i le kalasia ua avea ma Ekalesia ua fiafa'aamionu. Ua le tu'ua se avanoa mo latou ua leiloa, malepelepe ma latou e lē lelei atoatoa, ma e lē lava onosa'i mo latou ia.

Ina ia avea ma Ekalesia e fa'aosofiaina ma atagia mai ai le loto a le Tamā e pei ona fa'aalia mai e le fa'ata'oto a le atali'i fa'amaumau'oa, e tatau ona tu'uina atu o tatou loto ma'a'ina ia suia i ni loto 'a'anoa (va'ai Esekielu 36: 26). Ua na o le Agaga Pa'ia e mafai ona aumaia nei su-

iga a o ia aumai i tatou i le mafanafana o 'a'ao a le Tamā. Afai e avea i tatou o se Ekalesia e va'aia ai le agalelei a le Tamā, e tatau ona avea i tatou ma Ekalesia o tagata ua feiloa'i atu i le loto agaalofo a le Tamā.

O Se Fa'amaumau'oa ua Fo'i Mai i le Aiga

E fa'auma atu lenesi vaega i se tala e uiga i se tama'ita'i e lē matua tele i se tasi o palisi. Fai mai sa feagai atu lenesi tama'ita'i ma ni taimi faigatā tele. Na malepe lana fa'aipoipoiga ma tula'i mai o se tinā ua nofo to'atasi, ma puapua-gatia i tulaga na mulimuli mai ai.

Na ola mai i le Ekalesia ae na savali 'ese mai ai i lona talavou. Se tasi o aso na savali atu i luma o se falesa ma manatu ai loa i le vaiaso na soso'o ai e alu i le Misasa. Sa ia tusia se tusi i le palisi:

Atonu o a'u o se tagata e lē lava se mala-malama'aga e uiga ile Atua. Ou te leiloaina fo'i se tele o a'oa'oga e uiga i mataupu fa'alelotu. Ou te le iloaina le tele o fuaiupu mai le Tusi Pa'ia po'o ni fa'amatalaga fo'i e uiga i le tali-tonuga Katoliko. Ou te lē iloaina fo'i pe fa'apefea ona lauina le Losalio, ae ou te fia iloaina ma fa'anaunau e a'oa'o.

I le fai atu o na vaega e i ai mea ou te iloaina, e pei ona ou manavaina le 'ea: Ou te iloaina le mana a le Atua e maoa'e. Ou te iloaina e lē o a'u o lo'o pulea lo'u nei ola, ae ou te iloaina e fa'atasi mai pea le Atua ma a'u. Ou te iloaina e fa'aoga e le Atua tagata i ni auala matagofie tele, ma ou te iloaina e lē o taumafai le Atua e fa'asala a'u. Ou te iloaina e alofa le Atua iā te a'u – e ui o se mea faigatā lenā ona ou talia.

O lenesi tusi na tumu i se atamai na maua i ni auala faigatā, ma ua na o se vaega lenesi. Sa fa'auua pea ona fa'amatala lana malaga fa'aolaga:

Se tasi o taeao o le aso Sa, ua tasi le tausaga a la'u tama teine, na ou taunu'u ai i luma o le fale-sa. Sa lē malamalama pe na fa'apefea ona tupu lena mea. O na masina o se nenefu ou te le'i iloaina fo'i po'o le a le mea na tupu. Ua ou malosilava e galue ae e le'i alu'ese mai le pogisā. Ou te manatuaina le savali atu i totonu o le faitoto'a ae sa fefe ma mata'u. O lo'u fa'amoemoe mulimuli lenā ma sa ou popole, ona na ou iloaina o se fa'amoemoga mulimuli lava lenesi ma se taumafaiga e avatu ai i le Atua se avanoa

TOE FA'AFΟΥGA MAMANA

ma avatu lo'u nei olaga se avanoa a leai ou te leiloa pe mafai ona toe fo'i mai.

Ou te leiloa pe fia masina na ou 'au atu ai i Misasa ma lotu atu i le fa'apaologa. E le'i atoa lelei le tausaga a la'u tama ma e popole ina ne'i pisa tele. Fa'apefea pe afai e iloaina e tagata o a'u ua telē le fa'aletonu, pe o se tinā ua leai se to'alua? Fa'apefea pe afai e lē agalelei nei tagata? Sa ou lē mana'o e iloaina nei mea? Fa'apefea pe afai e lē alolofa? Ou te le'i mana'o e iloaina lea, o le mea lea sa ou lotu ai pea i le fa'apaologa ma fa'alogo i upu uma na tautalaina ai. Na ou tagi i taimi uma e pepese ai le aufaipese e uiga i le agalelei ma le alofa ole Atua. Sa ou fa'anaunau tele e talitonu i le alofa o le Atua, ae sa ou manatu e lē mo a'u.

I le i'uga na maua le loto tele e alu atu ai i totonu, e le'i sauni e tofua atu i ai ma nofoia se nofoa. Sa talanoa i tagata i tua o le falesa ina ua mae'a le Misasa. Sa ou fa'anaunau tele ia avea a'u ma vaega o lenei fa'atasiga po'o le a lava. Ou te manatua lo'u mafaufau pe moni 'ea lenei mea? O nei

tagata e uiga 'ese le agalelei!

O nei tagata ua pei o lenei fafine i fa'apopotoga e tele: ua naunau ma lagonaina ua leiloa. Ose fa'anoanoaga tele ua va'aia e tagata o a tatou palisi o ni nofoaga mulimuli e manana'o e o atu i ai. Latou te talitonu e lē fa'aulufaleina i latou. Ua latou va'aia a tatou palisi o ni nofoaga ua latou lagonaina ai le tu'ua'ia ma le fa'amasinoina, e lē o ni nofoaga e feiloa'i atu ai i le agalelei o le Atua le Tamā.

O le tala i lenei tinā o se tala maoa'e e mafai ona tatou fa'asoaina. E talitonuina o lana tala e mafai ona fesoasoani iā i tatou e mafaufauina po o le ā se ituaiga o Ekalesia e avea ma i tatou, o le ā se ituaiga o fua e mafai ona tatou fuaina mai o ni palisi ma pule'aga pe a tatou tomanatu atoatoa i le loto o le Tamā. *(ona fa'ai'u ai lea o lenei tusitusiga)*

O LE ASO NA FA'AMANATU AI LE TOETU'UTO O AOTEAROA NZ IA MARIA LE TINA O LE ATUA NA SI'ITIA I LE LAGI



OLE FA'ATASIGA A AGANU'U 'ESE'ESE SA AU ATU I AI KATINALE JOHN DEW MA
AKIEPIKOPO PAUL MARTIN FA'APEA NISI O LA TATOU KAPELNISIA



O LE FA'ATASIGA A AGANU'U 'ESE'ESE SA AU ATU I AI KATINALE JOHN DEW MA AKIEPIKOPO PAUL MARTIN FA'APEA NISI O LA TATOU KAPELANISIA



TUSI FA'A-APOSETOLO A LE AFIGA ILE TUPUSĀ POPE FALANISISI (fa'aliliuina Lauano A. Ilaoa)

Ua amata i lenei lomiga ona fa'aliliuina le Tusi Fa'a-Aposetolo mai lana Afiga ile Tamā Paia, ia Pope Falanisisi, mo le silafia ole mamalu ole Kapelanisia aemaise o lo tatou atunuu e fiafia e faitau ile tatou nusipepa, ole TAULOGOLOGO.

TUSI FA'A-APOSETOLO *DESIDERIO DESIDERAVI* A LE TAMĀ PA'IA FALANISISI

MO EPIKOPŌ, FAIFE'AU MA TI'ĀKONO,
MO ALI'IMA TAMA'ITA'I FA'AU'UINA
MA LE AU FA'ATUATUA UMA
E UIGA ILE TAPENAINA OLE SOIFUA TA-
PUA'I
O FANAU A LE ATUA

*Desiderio desideravi
hoc Pascha manducare vobiscum,
antequam patiar* (Lk 22:15)

10

1. O'u uso ma tuafafine peleina e,

o lenei tusi ou te mana'o ina ia o'o atu ma maua e outou uma - ile tuana'i ai o lo'u tusi muamua atu mo na o epikopō ina ua uma ona lomiga ole tusitusiga ua fa'aulutalaina ole Motu Proprio *Traditionis custodes (Tu ma Āga Tausi)* - ma o lea ua ou tusi atu ai, e fa'asoa atu ia outou uma nisi o lagona ma mafauauga e uiga i tapua'iga, o se vaega e aupito sili ona taua ile soifuaga ole Ekalesia. Ole autū, o se mataupu e matuā lautele ma e mana'omia ai ona iloiloia ma le toto'a ma le mae'ae'a i ona vaega uma ta'itasi. O le mea lea, i lenei tusi, e lē o iai so'u manatu e so'ona fa'aumiumi ma fa'amatalatala auiliili ona vaega taitasi. E pau le lagona ia te a'u, ole fa'asoa atu lea i ni vaega e fa'aosofia ai ma fa'amanatu, atonu e ono aogā mo manatu ma lagona e mafai ona fesoasoani i mafauauga fa'aleagaga, e uiga ile matagofie ma le tonu o tapua'iga fa'a-Kerisiano.

Ole Tapuaiga: ole "aso nei" ole talafa'asolopito ole fa'aolataga

2. "Ua tele lava lo'u mana'o e mua'i 'ai lenei Paseka ma outou, a'o le'i oo i lo'u tiga." (Lk 22:15) O ia upu a le Alii o Iesu, ile amataga o le

tala ole Paseka Mulimuli, o se avanoa vāapiapi lea ile papa, ua tatou maua mai ai se agaga naunau e fa'atino le loloto ole alofa i peresona e tolu aupito silisili ona pa'ia, ole Tamā, le Alo ma le Agaga Paia. (Most Holy Trinity).

3. O Petelo ma Ioane, sa a'uina atu e fai tapenaga mo le taligāsua ole Paseka, ae peitai ane, o mea uma ole foafoaga, ole tala fa'asolopito uma foi – lea ua maitauina le foliga ole a fa'aali tino mai ai le tala fa'asolopito ole fa'aolataga – o se tapenaga tele mo lea Paseka. O loo iai ile laulau ole Paseka ia Petelo ma isi, ae sa o latou le'i silafia lea tulaga, e ui o se mea ua tatau. E tatau, auā foi o meaalofoa uma, ina ia aveva ma meaalofoa, e tatau ona iai se tasi e na te talia ina. O le mataupu lenei, ole 'ese'esega tele ile vafeagai ai ole telē ole meaalofoa ma le la'ititi ole tagata na te taliaina, ose tulaga faifai pea e leai se iuga, e tatou te maofa tele ai. Ae ui o lea, ole mana fa'amagalō ole Alii, ua tu'uina mai ai ile au Aposetolo lenei meaalofoa, ina ia mafai ona maua e tagata soifua uma i alii ma tamaitai.

4. E leai se tagata ua ia maua se avanoa i totonu ole Tausama'aga. Ae o lo'o vala'auina uma i latou. Po 'o se isi fa'aupuga, ua tosina uma i latou ia ile mea o fai ai le Tausama'aga, ona ole musaesae ole mana'o ma le naunau, ina ia o latou talisua faatasi ai ma le Alii o Iesu ilenei Paseka. Ua silafia lelei e Iesu o ia ole Tama'i Mamoe o lea Paseka: ua ia silafia o Ia lava ole Paseka. O le tulaga aupito fou lea, e leai se isi mea e fa'atu-saina iai ia lenei Tausama'aga, auā e pau lea o se mea fou ile tala faasolopito, lea e mafua ai ona tulaga'ese le Tausama'aga lenei, ma lē mafai ai ona toe fa'aluaina, le "Paseka Mulimuli". Ae ui o lea, o lona finagalo ina ia toe maua le mafutaga vāvā lalata ma tatou, e pei ona sa iai ile amataga ma o loo tumau pea ile taimi nei, ole a lē mafai ona fa'amalieina lea, seia vaganā ua taumamafa tagata uma, alii ma tamaitai, o lanu ma gagana 'ese'ese uma (Fa'a.5:9), i lona Tino ma lona Toto. Ma o le mafua'aga foi lea, ole a aofia ai lea Tausamaga'ga ile sauniga paia ole eukalisitia, seia o'o ina toe afio mai o Ia.

5. E le o iloa lava e le lalolagi, ae o lo'o tala'iina tagata uma ile Tausama'aga ole Tama'i Mamoe

TUSI FA'A-APOSETOLO A LE AFIGA ILE TUPUSĀ POPE FALANISISI

(Fa'a 19:9). Ina ia ulufale se tasi i totonu ole tausama'aga, e tatau ona 'ofu i la'ei ole tausama'aga ole fa'atuatua, e auala *ile taologologo atu o lana Upu* (Rom.10:17).Ua su'iina e le ekalesia nei 'ofu ina ia fetau lelei ma tagata uma e 'o'ofu ai i la'ei *ua ta ina ma fa'asinasina ile toto e le Tama'i Mamoe* (Fa'a 7:14).E le tatau ona tatou malolo mo sina taimi, aua ua mautinoa, e le o tagata uma ua tala'aiina i lenei Tausama'aga, pe ua iloa foi o isi ua galo, po ua sē ma leiloa ile ala, ona ole mau fa'afilavei ole olaga nei. O le mea tonu a lenei sa ou tautala iai, "O la'u miti, ina ia iai 'se isi faiga fa'amisionare', o se malosiaga fa'amisionare, e mafai ona liua ai mea uma, ina ia tu'utasi iai tu ma aga a le Ekalesia, ma le fa'atinoina o ana galuega, le fa'asologa o taimi ma a na fuafuaga fai, aemaise o gagana ma fa'atulagana, mo le fa'atalaleleiga ole lalolagi o aso nei, nai lo le fa'atumauina o ia lava." (*Evangelii Gaudium*, n.27). O lo'u mana'o lea, ina ia mafai ona nonofo tagata uma ile Tausama'aga togiola ole Tama'i Mamoe ma ola mo Ia.

6. A e tatou te le'i tali atu i lana vala'au mai – a'o lei taitai tala'aiina i tatou e Ia, - ae ua leva ona iai lona finagalo naunau mo i tatou. Atonu tatou te le manatu iai, ae o taimi uma lava tatou te o ai ile Misasa, ole mafua'aga muamua lava e ala ai, ona e tosina i tatou e o, ona o lona naunau mai ia i tatou. Mo tatou la, o le tali talafeagai – atonu o se mea fa'atigā aupito mamafa lea, ole lafoai atu lea o mea uma i lona alofa, ile tu'uina atu o tatou tagata ato'ato'a ia te Ia. Auā o taimi uma lava tatou te tali Alii ai i le Tino ma le Toto o Keriso, ua uma ona ia finagalo iai ile Paseka Mulimuli.

7. Ole atoaga ole talisuaga ile Tino Paia, ole koluse lea o Iesu, o lana Togiola ma le onosa'i e pogai i lona alofa ile Tama. A na le seanoa le Paseka Mulimuli, po o se isi fa'aupuga, pe a na fai tatou te le'i mua'i manatu i lona maliu, semanu e tatou te le mafai ona manino ma malamalama lelei, pe fa'apefea e lona fa'asalaina ile oti ona avea o se gaioiga aupito sili ole fa'atuatua, e fiafia iai le Tama, o le ala e tasi e tapuai ma vivi'i ai, ona pau lea ole faiga mo tapuaiga fa'alelotu. O nai itula mulimuli ane ina ua maea le Talisuaga ole Paseka, sa ono mafai ona silafia e le Au

Aposetolo e ala ile koluse o Iesu, pe a na fa'apea sa o latou tauamoina lona mamafa, ia le uiga ole fetalaiaga a Iesu, "o lo'u tino lenei", ma "lo'u toto ua ofoina atu". O le vaega tonu lea, o lo'o tatou fa'amanatuina i taimi uma ile sauniga paia ole Eukalisitia. Ole toe foi mai o Le ua Toetu mai le Oti, e tofitofi le falaoa ma talisua faatasi ma ona so'o i Emau, atoa ma ona so'o o e ua toe foi e fagogota mo i'a ae le mo tagata ile Sami o Kalilaia, ma ole sauniga ole tofitofiina ole falaoa, na pupula ai o latou mata. Ua fa'amaloloina ai i latou mai le pogisa sa punitia ai o latou mata e mafua mai ile mata'utia ole koluse, ma fa'apea ona o latou mafai ai ona 'va'ai" i Le Ua Toetu Mai, ma talitonu ai ile Fa'aolataga..

8. A na fai tatou te taunuu i Ierusalemale ile tuana'i ai ole Penetekoso, ma le agaga naunau e lē gata ina ia maua ni fa'amatalaga e uiga ia Iesu le Nasareta, ma ia feiloai atu ia te Ia, atonu e leai se isi mea e mafai ona tatou fai nai lo le saili i ona so'o e tatou te iloa ai ma fa'alogi i ni ana saunoga. Atonu e leai se isi avanoa sili atu tatou te feiloai ai ma ia nai lo se faatasiga fiafia.Ole mafua'aga lea, e puipui malu ai e le ekalesia lana mea totino aupito sili ona taua, ole poloaiga a le Alii, "Ia outou faia lenei mea ma fa'amanatu ia te a'u"

9. E mai lava ile amataga, sa silafia lelei e le Ekalesia, o lenei mataupu e le fa'apea o se mea e tau ina fa'ataunuu, le sauniga paia, ole Talisuaga a le Alii. Semanu e leai se uiga, ma e leai foi se tasi e ono manatu e tau ivā ina ia fai ma faataunuu – aimaise ai i luma o fofoga o Maria, le Tina Paia ole Alii – ia le taimi aupito maua ile soifuaga ole Matai. E mai lava ile amataga, sa tofi ma pu'epu'ema e le ekalesia, ma le fa'aosofiaga a le Agaga Paia, ia le tulaga sa mafai on va'aia ia Iesu, i mea e mafai ona va'aia e mata ma tago iai lima , o ana upu ma gaioiga, aemaise ole moni ma le mausali ole Upu ua liutino tagata - o mea uma ia te ia ua aofia i sauniga o sakalameta paia.

Ole tapuaiga: ole nofoaga e feiloai ai ma Keriso.

10. O 'i tonu lea e ta'oto ai le malosi ole matagofie o le faiga o tapuaiga. Afai ole fa'aolataga ua na o se mafaufauga mo tatou, po o se manatu ma se lagona: a na fai o Lē Ua Toetu Mai, ua tatou

TUSI FA'A-APOSETOLO A LE AFIGA ILE TUPUSĀ POPE FALANISISI

manatu, o le tuufaatasiga lea o ni manatu ma lagona mai manatu ma lagona o isi, e tusa po'o le a le taua, e pei o se fa'ata'ita'iga, ole au Aposetolo; a na fai e lē tuuina mai ia i tatou le avanoa mo se feiloaiga moni ma Ia, ina ia fa'ailoa atu ai le fou ole Upu ua liutino tagata. Ae peitai, ole Liutino Tagata ole Alii, e le gata e na ole pau lea ole mea fou o loo molimauina e le talafa'asolopito, e na ole pau foi lea ole auala ua saunia e le Tasi Tolu Paia, e tatala mai ai mo i tatou le mafutaga paia ole komunio. Ole fa'atuatua Kerisiano, afai e le o se feiloaiga ola ma Ia, o lona uiga, e le tatau ona iai se mea fa'apea.

11. O le Tapuaiga o se fa'amaoniga lea mo tatou ole maua o lenei feiloaiga mafana ma le Alii. E leai se aoga, pe a fai na o lo tatou tau manatua ole Talisuaga Mulimuli (Paseka Mulimuli). E tatau ona tatou auai ile taimi o lona Talisuaga, ia mafai ona tatou fa'alogo i lona siufofoga, tatou a'ai i lona Tino ma feinu i lona Toto. Tatou te mana'omia o Ia. Ole Eukalisitia fa'apea ma isi sakalame-ta uma, e mautinoa lava lo tatou maua ai ole feiloaiga mafana ma le Alii o Iesu ma lofia ai tatou i

le misitelio o lona maliu ma lona toetu.

Ole malosi o le mana fa'aola o le togiola a Iesu, o ana upu uma, ma ana gaioiga, atoa ma ona fa'alogona, e o'o mai ia i tatou, e auala ile fa'atinoina o sakalameta. O a'u o Nikotemo, ole fafine Samaria ile vai eli, o le tagata na ulufia e temoni i Kapanauma, ole pipili ile fale o Peteru, ole fafine agasala lea na fa'amagaloina, ole fafine na maua ile punatoto, le afafine o Iairo, ole tauaso i le aai o Ieriko, o Sakaio, Lasalo, le gaoi ma Peteru ia na fa'amagaloina uma. Ole Alii o Iesu, e le toe maliu lava o Ia, o lē e soifua pea e fa'avavau ma fa'ailoga o ona puapuaga, e fa'auau pea lana faamagaloga mo tatou, na te fa'amaloloina tatou, ma fa'asaoina i tatou ile malosi o sakalameta. Ole auala aupito i mausali lea, e ala i lona liutino tagata, e fa'ailoa mai ai lona alofa mo i tatou. Ole auuala lea e fa'amalieina ai lona agaga naunau mai mo tatou, e pei ona Ia fa'ailoa mai i luga ole koluse. (Ioa 19:28).

(E faia pea)

GALUEGA A LE AU APOSETOLO (FA'AAUUAU MAI LOMIGA TALU AI)

13: 14 – 52 UA TALA'I ATU PAULO I LE SINOKA I PISITIA ANETIOKA

E ui o le igoa o Kalatia i taimi o le ulua'i malaga tala'iga, o 'au'aunaga a Paulo ma Panapa i Anetioka o Pisitia (ia malamalama i le 'ese'esega mai le Anetioka o Suria), pe toluselau maila i sasa'e), ma aga'i atu i Ikonio, Lusa ma Teipe, ma avatu ai i la'ua i le vaega i saute o lenā ituamalō i lalo le pulega a Roma. Ona e leai ni molimau na fa'aevagelia Paulo i luga atu i matū i Kalatia, e masalomia o "ekalesia nei a Kalatia" sa talanoa atu i ai Paulo i lana tusi ta'uta'ua i le igoa lava lenā (Kalatia 1: 2 ma va'ai 1 Korinito 16: 1).

A o amata le galuega fa'aaposetolo a Peteru i se lauga na folafolaina ai le soifua, maliu ma le toetu o Iesu i le malamalama'aga i le Tusitusiga Pa'ia Eperu (Galuega 2), o lenei ua faia e Paulo fa'apea. E pei o Peteru, na muamua ona avatu lana fe'au i ona tagata Iutaia ma le Tagata o Nu'u'ese "e mata'u i le Atua". E pei o le tulaga i le lauga a

Peteru i le Penetekoso, ua tatou va'aia le lima o le tusi tala fa'asolopito a Luka le fa'aogaina o le faiga o fa'auigaina fa'a-Eperu, o lona uiga, o le fa'aogaina o tusitusiga e fa'auigaina ai mea na tutupu talu ai nei i fa'apotopotoga i le malamalamaina o le fa'atuatua o le Eseta.

O le va'aiga o se fa'amanatu o le lauga a Iesu i totonu o le sunako i Nasareta (Luka 4: 14 – 30). O le fa'apotopotoga Iutaia o lona pitonu'u ua potopoto mo le faitauina mai ole Tusitusiga Pa'ia ma mulimuli mai ai ma le fa'amatalaga e uiga i faitauga. I se va'aiga lautele na toe fa'aoga e Paulo ni manatu tāua o le va feagai ai fa'apitoa a le Atua ma Isaraelu: le sola'aga mai Aikupito, le vaitau i le toafa, le manumalō, ma le fa'atupu (Saulo ma Tavita). Ona ia "fa'avave i luma" i le sau o Iesu o le fa'aola o Isaraelu, na fofogaina mai e Ioane. O le fa'aupuga "e pei ona ia folafolaina

mai” ma i lenei tusitusiga o lo’o fa’asino ia Iesu o se suli a Tavita ua foliga mai ai le perofetaga a Natano ia Tavita ae maise le va’aiga (2 Samuelu 7: 12 – 14).

O le vaega lona lua o le lauga, e uiga i le maliu ma le toetu o Iesu ma le tala’iga a le ekalesia, ua fa’amamafa i vaega fa’atusi pa’ia e fa’aliliuina ai le lagona fa’a – Kerisiano.

E pei ona tatou fa’amoemoeina mai ia Luka, o le tu’ua’ia mo le maliu o Iesu ua tu’uina atu lea i ta’ita’i Iutaia ma Roma. Ae o le maliu ua fa’auigaina o se fa’ataunu’uga o “upu a le au perofeta” ma “mea uma lava na tusia iā ia” (vv.27, 29). O ni vaega muamua a Luka – Galuega na a’oa’o maia i tatou nisi o faitauga mai Tusitusiga Pa’ia o lo’o fa’asino i ai fa’aupuga fa’apea – mo se fa’ata’ita’iga, Isaia 53: 7 – 8 (Galuega 8: 32 – 33); Salamo 31: 6 (Luka 23: 46); ma tala ia Iosefo ma Mose i le Tora fa’aalia le faiga o le ta’ita’i ua te’ea ua aveva ma fa’aola (Galuega 7: 9 – 38).

O se va’ai la i le toetu, o lo’o anoanoa’i ma le manino le Feagaiga Tuai i fa’asinomaga. Fa’asino i le “toetū a’e” le alo a Tavita (v. 33), fa’apea ona lauiloaina o le Alo o le Atua, ua avatu ai se fa’auga fou i le 2 Samuelu 7: 12- 14 (“Ona ou fa’atuina ai lea o so lau fanau pe a mavae atu ‘oe...E fai a’u mona tamā, e fai fo’i o ia mo’u atali’i”). O le fa’aupuga mai le Salāmo 2: 7 (“O lo’u Atali’i oe, o le aso nei ua ou fanauina ai ‘oe”) ua fa’auigaina le toetū o le taimi o le afio atu i le nofoali’i o le tupu o Isaraelu. O le mea lea, o le fa’aupuga lava e tasi na tatou fa’alogo muamua i ai i Ionatana (“O lo’u Atali’i pele ‘oe” Luka 3: 22), o lo’o fa’asino lea i le atali’i mamana ma fa’ailoa mai ai le gafa ua tau i tua ia “Atamu, le atali’i a le Atua,” ua fa’alauteleina mai ai – lē o le Mesia.

O le fa’aupuga mai ia Isaia 55: 3 (“Ou te osia fo’i le feagaiga e fa’avavau ma outou, o mea alofa ia na folafolaina ia Tavita”) ua va’aia le uiga atoatoa pe a tatou iloaina le vaega tonu o lenā mai ia Isaia ua a’afia ai le fa’asinomaga i se feagaiga e fa’avavau (v.2) ma le tala’iga i tagata o nu’u ‘ese (v. 4). E pei ia Luka 24: 46 – 47, o moni uma e tolu – le maliu ma le toetū o le Mesia ma le tala’iga a le ekalesia – o lo’o mau a’a i Tusitusiga Pa’ia. O le fa’aogaina o le Salāmo 16: 7 (“Ou te fa’amanū atu i le Ali’i, o lē fa’atonu mai iā te a’u”) ua fa’ataunu’uina ai e lē iā Tavita ae o le

toetū o Iesu, fa’aleo mai ai le fa’auigaina na faia e Peteru i le fatu o lana tautalaga o le Penetekoso (Galuega 2: 25 – 31).

O le gagana e uiga i le ta’uamiotonuina e ala i le fa’atuatua i fuaiupu 38 – 39 ua fa’ailoa mai ai Paulo ua fa’aogaina le gagana e masani i ana tusitusiga, aemaise ia Roma ma Kalatia.

E ui o lenei lauga ua talia lelei ma le “to’atele” i lenā fa’apopototo i le sunoka na mulimuli iā Paulo ma Panapa, ina ua “fa’atasia fo’i ē ua fa’atuatua uma lava” (v.44) e lē masalomia na a’afia ai ma le anoanoa’i o Tagata mai Nu’u’ese, le ‘au masalosalo) Iutaia ua amata ona fete’ena’i ma Paulo. O le mafua’aga lea o le tatalo mulimuli a le Tusi Pa’ia, fa’ailoa le fa’auauina ma le fou ma le uiga ‘ese. O le faitauga mai ia Isaia o lo’o ta’ua e Simeona i lana pese i le molimoliga o Iesu i le malumalu (Luka 2: 29 – 32) ua ta’ua atoatoa e Paulo (v. 47): “Ua ou avatua fo’i oe e fai ma malamalama o nu’u ‘ese, e fai ma’u fa’aolataga ia o’o i tuluiga o le lalolagi” (Isaia 49: 6b) O le mea na fa’aoga e Simeona iā Iesu, o lenei ua fa’aoga e Paulo iā ia lava ma Panapa o ni vaega o le talaiga Kerisiano. Ioe, ua fa’ailoa e Paulo, “...ua folafolaina iā te outou le fa’amagaloina o agasala ona o lenei tagata (Iesu) (v. 38). O le mea lenā o le Ali’i toetu o Iesu ua galue nei e ala iā i latou e pei o Paulo ma Panapa. O lona maoa’e ina ua te’ea e tagata Iutaia le tala lelei na mafua ai ona liliu atu i tagata o nu’u ‘ese (v.46).

O se mea mālie ae tigā ua fa’aalia e Luka o se malamalama’aga sa i ai o se tala’iga Iutaia e aveva ma “malamalama i Tagata o nu’u ‘ese” ua tia’i i tua le tele o tagata Iutaia. Mulimuli mai ai na toe fo’i mai Paulo ma Panapa i Pisitia Anetioka e fa’amalosi i loto o le au so’o i’inā ma tofia le au toaina (14: 21 – 23) ua fa’ailoa mai ai sa tu’ua se fa’apopotoga o le au fa’atuatua (masalo o Iutaia ma Tagata mai nu’u ‘ese o lo’o ta’ua i le 13: 43) ina ua la tu’ua lenei a’ai.

Pe o le malosi o le gagana a Paulo i le fuaiupu 46 – 47 o lona uiga ua tu’ua e le Atua tagata filifilia ona ua lē fa’atuatua? O lenā fa’auigaga o le ulua’i la’asaga a le au Iutaia e Kerisiano. O le manatu a Luka o lo’o atagia mai tusi a Paulo lava ia: o le evagelia sa fuafua muamua mo Iutaia, ona soso’o mai ai lea ma Tagata mai Nu’u ‘ese. O le isi mafua’aga ina ia aumai fa’ata’ita’iga o le masani o tala’iga a ulua’i Kerisiano: o le fea’u o le talia e

GALUEGA A LE AU APOSETOLO (FA'AAUAU MAI LOMIGA TALU AI)

13: 14 – 52 UA TALA'I ATU PAULO I LE SINOKA I PISITIA ANETIOKA

nisi o tagata Iutaia ma Tagata o nu'u 'ese ma te'ea e isi, o le a fa'aogaina e le Atua leni te'ega o se avanoa mo le aga'i i luma o le tala'iga (o le fa'auigaina fo'i leni a Paulo i Roma 11). O le a fa'aaauu ona talanoa Paulo i tagata Iutaia o se faiga o le galuega, mo se fa'ata'ita'iga, Ikonio (14: 1), Tesalonia (17: 1), Perea (17: 10), Atenai (17: 17) Korinito (18: 4), ma Efeso (18: 19).

I le tafi 'eseina o le palapala mai iā latou vae (v.

51), o Paulo ma Panapa ua gaii i fautuaga a Iesu na avatu i le To'asefululua (Luka 9: 5) ma Fitusefulu – lua (Luka 10: 10 – 11. Ma le fiafia a le au so'o i le ogatotonu ole te'ea ma gaiiga o le fa'asauaga mai le Fa'amanuiaga lona fa'a le Mea Lau Gatasi (Luka 6: 23)...*fa'aaauu pea...*

SAGATO MATAIO

APOSETOLO MA LE TUSI EVAGELIA



O Mataio o se Iutaia sa galue mo le autau a Roma sa pulea Isaraelu, ao mai lafoga mai i si tagata Iutaia. E ui e le'i fatagaina e Roma le ogaoga o le faoina fa'amalosi, o lo latou manatu autū o ni a latou lava tupe ma 'oa. Sa le'i mata'alia e uiga i mea na maua e le au ao-lafoga mo latou lava ia. O latou fo'i ia na ta'ua mulimuli o le au "ao lafoga" sa mata'utia le itagia o ni 'au fa'alata e o latou uso Iutaia. O le au Farasaio na tu'u fa'atasia i latou ma le 'au agasala'. O le mea lea na matuā fa'ate'ia ai i latou ina ua fa'alogu atu iā Iesu ua vala'auina se tagata fa'apenei e avea ma se tasi o ona so'o.

Na tu'uina atu e Mataio Iesu i se lavelave ina ua ia faia se fiafia fa'amavae i lona fale.

Ua ta'u mai e le Evagelia iā i tatou o le to'atele o le au ao lafoga ma 'latou sa va'aia o ni tagata agasala' na 'au ai i lea fiafia. Ae o le au Farasaio sa mata'utia le maofa. O le ā le pisinisi a leni a'oa'o sili i le fa'atasi atu ma nei tagata e lē amio tonu? O le tali a Iesu na avatu, "E lē aogā le foma'i i e malolō, na o ē mama'i. Inā o ia, inā a'oa'o po o le ā le uiga o lea upu, *Ou te lotu i le alofa, ae lē o le taulaga*; auā ou te le'i sau e vala'au i e ua amiotonu, a o e ua agasala" (Mataio 9: 12 – 13).

E lē o tu'ua fa'aautafa e Iesu sauniga ma faigataulaga; o lo'o fa'apea mai o le alofa atu i isi e sili atu lona tāua.

E le'i i ai se isi mea fa'apitoa na tupu e uiga ia Mataio ua maua i le Feagaiga Fou

O LE MITI A LE KOLUSE

E tusa ma le afe ma le luaselau tausaga pe ā i tausaga ua tuana’i, i le vailuaga o le po a o malolo le lalolagi ma momoe, o se ali’i tusi solo Peretania sa mauaina se va’aiga ua sili atu lona matagofie. Sa foliga mai ua ia va’aia le la’au o le mamalu “fa’aeaeaina i le teuteuina ini la’ei, susulu ma le olioli, ufiufi i ‘auro: o ma’a tāua ua ufitia ai ma le matagofie le la’au o le vao”.

E fa ni ma’a tāua o lo’o ta’atitia i luga o le ‘ele’ele ma e lima o lo’o i lima fa’alava o le koluse. O le la’au matagofie o le koluse ua si’i a’e i le ‘ea, si’omia e le malamalama, le susulu ua sili le pupula, ma agelu a le Atua ua fepulafi atu i ai.

E o’o lava i le uma o seneturi e tele, o le malosi fa’aelemene o Le Miti a le Koluse o lo’o umia pea i tatou ma pu’epu’eina pea o tatou mafaufau.

O le koluse fo’i ia ua amata ona tautala ma fa’ailoa lē na tusia le solo. Ua fa’amatala le tala o le puapuaga ma le maliu o le toa talavou o lē na tutu’i i le la’au, ma i ona lava puapuagā mai totonu ma ona fa’ailoga loloto ma Keriso i ona puapuagā. O le Koluse la ua tautala mai i le Toetu. O lenei “manuia ua sau” ina ia fa’aaloalo uma le lalolagi i le Koluse. O se mea sa avea puapuagā ma mea faigaluega o lenei ua suia i se mea faigaluega o le mamalu.

I leo o le maofa ma le matagofie, o le Koluse ua ta’u atu i le tusi solo o le Alo o le Atua lava ia ua puapuagā i luga o lana la’au mo se taimi, ina ia aga’i atu le Koluse i luga, i lalo mai o le lagi o le mamalu ma aumaia fa’amalologa i tagata uma ua manatu i ai. Tatou te manatu sa’o lava i perofetaga a Keriso lava ia i le Evagelia a Sagato Ioane ina ua si’i a’e o ia i luga, o le a ia tosigā mai tagata iā ia lava. E pei o le solo i le gagana Peretania, o le mana a le Koluse e suia ma lona mamalu o le sini lea o le Sulufaga o le Fa’amamaluina o le Koluse Pa’ia, fa’atafi ai ma lona olioli fa’amamaluina ma le manumalō.

O le fa’ailoga o le fiafia ma le olioli ua fesoasoani iā i tatou e malamalamaina pe aiseā i le Ekalesia anamua ona i ai se alofa o le *crux gemmate*, le koluse teuteuina i ma’a tāua, e lē o se ituiga o teuga ae o se taumafaiga fa’atusi āta e fa’amatala ai se mea e susulu ma le malamalama o le toetu lava ia i le uiga o le susulu malamalama o ma’a tāua ma pine u’amea. O le koluse teuteuina o se fa’ailoga o le fa’alavelave i le fatu o lo tatou fa’atuatua: o le la’au o le fa’asalaina o lenei ua avea

ma la’au o le manumalō fa’aapokalifa, o le La’au o le Parataiso Fou ma fa’ailoga o le lalolagi ua toe fa’aolaina.

O le manatu susulu o le malamalama i le Ekalesia anamua o le fa’aeaina mamalu ma le manumalō o le Koluse ua mauaina lona fa’amatalaga fa’asolota’uta’ua i ni pese lotu se lua na tusia i le 569, o lo’o fa’aogaina pea i sauniga i aso nei. O nei pese sa tusia e Venantius Fortunatus, le Epikopo o Poitiers ma se fai solo a le maota o le tupu o Merovingian, mo le polosesio mamalu e fa’afeloa’i ai le taunu’u o se vaega o le Koluse Moni, o se mealofa a le Tupu o Byzantine o Justine II ma lanna Masiofo o Sophia i le Masiofo Radegunda.

O nei pese lotu e lua, o le *Pange Lingua* (“Pese lo’u laulaufaiva le taua mamalu”) ma le *Vexilla Regis* (“fua tau tupu aga’i i luma”) sa tusia i le mita a le vaega’au a Roma, latalata i le seneturi talu le to’ilalo o le Malo Roma i sisifo. Ae o lo’o manatua pea i mafaufau o tagata vaega’au fitafita a Roma. Sa fa’aogaina e Fortunatus o mafaufauga ma āta fa’alemafaufau o le mamalu fa’atupu e momoli mai ai le malosi ma le mamalu o le Koluse. Ae sa ia tautala i le Koluse o se tulaga o taua a tupu, le la’au na fa’amatagofieina e lona toto, o le mafua’aga lea fa’alemālō. O le fua o le la’au, le aufaipese a latou ua fa’aolaina, pese a le manumalō mamalu a lē ua manumalō. E lē gata o le Koluse o lona uiga o le fa’aolataga, o se ma’afa’amanatu (“fa’ailoga”) o lo’o tautau ai fa’ailoga o le fili ua fa’ato’ilaloina.

Ua peseina e Fortunatus le taua mamalu ma vivi’i le Koluse fa’atuatua, ua sili atu i mea uma, le la’au e tasi. E leai se isi la’au e mafai ona tauvā atu i le Koluse i olaola, laula’au ma fua ona e fua mai ai le suamalie o ūta uma lava. Fa’ataunu’uina o le perofetaga a Tavita, ‘Ia outou fai atu i nu’u ‘ese, e nofo tupu mai le Atua i le lalā la’au.

Se tasi o sini fai so’o a Pope Penetito o vaega ta’itasi o le Tusi Pa’ia e ao ona fa’auigaina i le malamalamaina atoa, ma upu uma a le Tusi Pa’ia i le malamalama o le Upu ola, o Keriso lava ia. Ua tatou va’aia lea ua fa’aalia i le sauniga o le Sulufaga o le Fa’amamaluina o le Koluse.

O Keriso o se kamuta sa fa’avaeina i luga i Kolokota le la’au o le Koluse – le La’au fou o le Ola, e ala mai ai le olioli na sau i le lalolagi ma le vateatea atoa ua fa’aolaina. Vi’ia le Koluse, lo tatou fa’amoemoe.

O LE MITI A LE KOLUSE

Amoina o La Tatou Koluse

O le mafuaga o puapuagā ina ia a’oa’oina ai i tatou, i le i’uga lava, ua leai so tatou fa’amoemoe vaganā le Atua, ina ia una’ia i tatou e tu’u atu o tatou fa’anaunauga uma iā te ia. A tetele ni tigā ua o’o lava i se tulaga ua leai se mea e mafai ona tosigā ‘ese mai ai tatou, ua malosi tele ua avatu i ai la tatou va’ai, ona tataua lea ona mou atu lo tatou malamalama pe maua i le fa’avalevlea mo sina taimi pe sopo’ia lea tulaga i le fa’aogaina o le agalelei. O faiga a lo tatou Ali’i e tumau. O lona lagona ita atoa, tu’ua e ana uō ma ave’eseiana fa’amafanafanaga fa’alalolagi nei, ua ia auina atu lona agaga i le fa’anaunauga aga’i i le Tamā i se gaioiga maoa’e ole alofa ua fa’aolaina ai i tatou. “Le Tama e, ou te tu’uina atu lo’u nei agaga i ou ‘a’ao.” O le fatu lenei o le fa’aolataga, le faitaulaga a le koluse. Leai se tigā, e lē o se faigataulaga to’atasi ua avatu i le Atua o se ituaiga o mealofa – e pei e mafai ona tatou avatu so’o se mea i le Atua e pei o ia e lē āna, po’o e pei (e fa’apea fo’i ona le mafaufauina) e fiasia i puapuagā a le tagata. O le toto ma manu’a o Kalevalio o ni fa’ailoga o se alofa e fa’avavau. E ala mai ai ua fa’aalia mai e Keriso i le lalolagi le va latalata o lana mafutaga ma le Tamā. I lenei auala ua ia aumaia ai o ia lava o se fa’ata’ita’iga, ma avatu ai foliga i le aoao ma uiga tāua e tasi o le taulaga i le Atua: tu’utō mai totonu o le agaga. O le ā lava ua avatu i le Atua ina ia si’i a’e ai le agaga o le tagata iā te ia e mafai ona ta’ua o se faigataulaga.

16

Fa’aeaina le Koluse i o Tatou Olaga

O le Ala o le Koluse...ua vala’auina ai i tatou uma, aemaise aiga, e tomanatu ia Keriso fa’akoluseina ina ia maua ai le malosi e fo’ia ai fa’afitauli. O le koluse a Keriso o se fa’ailoga sili o le alofa a le Atua mo ali’i ma tama’ita’i uma, o le tali e lē fa’atua’oia i mana’oga o tagata uma mo le alofa. I taimi o fa’afitauli, pe a feagai o tatou aiga ma tigā ma puapuagā, se’i o tatou va’ai atu i le koluse a Keriso.

O taimi o tofotofoga ma faigatā, tatou te lē o tutū ta’ito’atasi; o le aiga e lē o tia’ia. O lo’o i ai Iesu ma lona alofa, lagolagoina i latou e lana kalasia ma avatu le malosi e mana’omia e fa’aaauai ai pea, ma faia faigataulaga ma sopo’ia faigatā uma. Ma o lenei alofa a Keriso ua tataua ai ona tatou liliu pe a fa’amata’u e faigatā ma fa’afitauli a le tagata le fa’atasiga o tatou ola ma o tatou aiga. O le misitelio o puapuagā, maliu ma le Toetu o Keriso ua fa’aosofiaina ai i tatou e fa’aaauai pea i le fa’amoemoe: taimi o fa’afitauli ma su’esu’ega, pe a onosa’ia ma Keriso, ma le fa’atuatua iā ia, ua mauaina mai le malamalama o le Toetu, o le ola fou a se lalolagi ua toe fanau mai, le paseka a latou uma ua talitonu i lana Upu.

I lenā Ali’i fa’akoluseina o le Alo o le Atua, e o’o lava i le maliu lava ia ua tauavea se uiga fou ma le mafua’aga: ua fa’aolaina ma ausia, ua aveva o se auala i le ola fou.

FAITAUGA MO LE MASINA O SETEMA - 2022

ASO 4 SETEMA ASO SA 23 TAUSAGA MASANI:

Faitauga muamua: Poto 9: 13 – 19. Matua: O ai se tagata na te mafaia ona fua le atamai o le Atua.

Salamo: 90: 3 (tali), 5 – 6 (tali), 12 – 13 (tali), 14, 17 (tali). Tali: Le Ali'i e, ua fai oe ma mea matou te nonofo ai i lea tupulaga ma lea tupulaga.

Faitauga lona lua: Filemoni 9 – 10, 12 – 17. Matua: Inā e talia mai o ia, o lo'u lava tino ia.

Aleluia, Aleluia... Ua ou ta'ua outou o uō, auā ua 'ou fa'aailoa atu iā te outou i mea uma na 'ou fa'alogo ai i lo'u Tamā... Aleluia!

Evagelia: Luka 14: 25 – 33. Matua: E fa'apefa fo'i so outou e lē lafoa'i ana mea uma, e lē mafai ona fai o ia mo'u so'o.

Tofitofiga o le Upu:

I ana tusitusiga, e le'i fa'atafa lava Paulo e avatu se fa'amatalaga e uiga iā ia lava, o ana tauiviga ma ona fa'alogo'aga: ua mafai ai ona tatou va'ava'ai i le tagata moni. I lana tusi ia Filemoni, ua fa'aali mai ai e Paulo o ia lava o se toea'ina o lo'o tauivi ma lona vala'auina ma ua iloa fo'i ma lona tau. Ae e lē o maua lava i ana tusitusiga se fa'aailoga ua musuā. O Paulo o se fa'ata'ita'iga o le fa'atuatua fa'amaoni po o le ā lava lona tau. I lenā manatu o ia o se fa'ata'ita'iga o se tasi ua manatu o lo'o vala'au mai i ai Iesu i le evagelia. I sosaiete fa'aonaponei o lo'o vaevaeina ai le olaga i vaega ua ta'ua o galuega, aiga, olaga fa'asosaiete, taimi paganoa ma vaega fa'apena, o le fa'atuatua e mafai ona fa'aailoa o se manatu fa'aletagata lava ia ua na o se vaega o le mea atoa. O lo'o fa'atauanau mai Iesu e lē mafai e le evagelia ona faia fa'apea: o le fa'atuatua e lē o se taimi ua tuana'i ua a'afia ai lē ua tali-tonu mo se vaega o le taimi, po'o se vaega o le olaga o se tasi. O le lu'itau moni lea: e lē fa'apea ona o le fa'atuatua e i ai lona *nofoaga* i le olaga o se tasi, ae ona o le fa'atuatua ua fa'aliliuina *vaega uma* pe fa'apefa ona ola ai le olaga a se tasi.

O le faitauga mai le tusi o le Poto o lo'o fa'atauanau mai o se malamalama'aga fa'apenei e lē ausia e se manatu fa'aletagata, ae ala i le fa'aosofiaga, e ala i le mealofa mai le Atua. Atonu e lē talafeagai le aveina o le koluse, foa'i uma atu oloa a se tasi, ina ia tauivi pea e pei o Paulo, ae atonu o le mana'oga lenā o lo'o aumai e le *Poto*.

ASO 11 SETEMA ASO SA 24 TAUSAGA MASANI:

Faitauga muamua: Esoto 32: 7 – 11, 13 – 14. Matua: Ua salamō le Ali'i i le leaga na fai na fa'ao'o atu i lona nu'u.

Salamo: 51: 1 – 2 (tali), 10 – 11 (tali), 15, 17 (tali). Tali: O le a'u tula'i ma alu i lo'u Tamā.

Faitauga lona lua: 1 Timoteo 1: 12 – 17. Matua: Na maliu mai Keriso Iesu i le lalolagi na te fa'aolaina o ē agasala.

Aleluia, Aleluia... O lau afioga o le upu moni lea; ia e fa'apa'iaina i matou i le upu moni... Aleluia.

Evagelia: Luka 15: 1 – 32. Matua: Ua fa'apea le olioli i luma o agelu a le Atua, ona o le tagata agasala e to'atasi e salamō.

Tofitofiga o le Upu:

O le faitauga mai le evagelia ua tatou masani ai, ae ia maitau o lo’o amata mai i se fa’aseā e uiga o ai e ‘a’ai fa’atasi ma Iesu. I le evagelia – e pei o le tele o vaega o le Tusi Pa’ia – o lo’o i ai se fa’amama-fa tele i le nonofo i le laulau ma isi. O se vaega tutotonu leni i le aganu’u o le talimalō, tulafono masani, fa’auō, auai ma le alofagia o vaega uma nei o ai ua i le laulau ma ‘oe. O fa’ata’oto e tolu ua aumai e Luka ua tu’uina mai ai iā i tatou ua tauluga i le fa’ata’oto o le atali’i ‘fa’amaumau’oa’. Ua faia se fiafia i le toe fo’i mai o le atali’i i se auala ua tatau – o se faigā ‘aiga fiafia. Sa lē i ai le atali’i i le laulau a o aga’i atu i le taimi sa fa’ama’imau ai ana ‘oa, ma na i’u ina fa’atasi ma pua’a o ni pa’aga i le laulau, o leni ua toe fa’asa’o. Ae pagā lea ua iloa e le tamā o lo’o i ai pea se nofoa i le laulau e leai se isi o nofo ai ona o lona atali’i matua ua lē ulufale mai. E pei o le talimalō i le fa’ata’oto o le fa’apoipoiga, na fa’anaunau tele le tamā ina ia fa’a’atoa tagata i lana laulau, ma tagata uma e tatau ona au ai. Ae o le a lē fa’amalosia i latou e lē fia ‘au ai. E pei ona potopoto mai tagata mo le Eukalisititia, tatou te iloaina e to’atele o le a lē au mai ai mo le tele o ni mafua’aga. O nisi o le a pei o le atali’i la’ititi ua maua se mea ua sili atu le matagofie, o nisi o le a pei o le atali’i matua ua filifili e fa’a’ū’ū ma tomumu ona ua latou manatu ua fa’asilisili i si i lo latou. O le tusi a Paulo ia Timoteo ua fa’a’ailoa mai ua ia sesē ona sa faia e ia ma le valea se’ia vala’auina. O le taunu’uga o le tala’aga o le fa’aolataga o le talisuaga a le fa’aipoipoiga o le mamoe, folafolaina mai tausaga e fia, le tala’iga a le Ekalesia o le fa’amautinoa ina ia lagona e tagata uma le vala’au ma ia mafai ona tali atu: ‘amuia i latou ua vala’auina i le tausama’aga a le tama’imamoe’.

ASO 18 SETEMA ASO SA 25 TAUSAGA MASANI:

Faitauga muamua: Amosa 8: 4 – 7. Matua: Ua fetāla’i le Ali’i i ē fa’asauā i ē matitiva.

Salamo: 113: 1 – 2 (tali), 4 – 6 (tali), 7 – 8 (tali). Tali: Ia outou vivi’i atu i le Ali’i, o lē na te fa’aeaina lē ua mativa.

Faitauga lona lua: 1 Timotea 2: 1 – 8. Matua: Ia faia tatalo mo tagata uma lava, auā o le Atua e finalo ina ia fa’aolaina tagata uma lava.

Aleluia, Aleluia...O lau afioga o le upu moni lea; ia e fa’apa’iaina i matou i le upu moni...Aleluia.

Evagelia: Luka 16: 1 – 13. Matua: Tou te lē mafaia ona ‘au’auna i le Atua atoa ma le ‘oa.

Tofitofiga o le Upu:

A tatou fa’alogologo lelei i ai, o faitauga o le asō e ogaoga ni lu’itau ua tu’uina mai mo tatou ma la tatou sosaiete. O Amosa o se perofeta sili ma le faimea tonu mai le Feagaiga Tuai, fa’amata’u i le au malolosi ma le au maumea ua fa’aogā o latou malosia ma le ‘oa mo latou lava ma soli ai i lalo le au matitiva. O lo’o fa’atauanau mai Paulo ia tatou tatalo mo latou o lo’o u’uina le paoa, latou o lo’o u’uina le pule. Ua aumai e Iesu se fa’ata’oto ua faigatā iā tatou ona malamalamaina ona e foliga mai o lo’o fa’asala ni faiga e lē lelei. Ua tatou tauivi i le tele o ā tatou sosaiete ua fa’apolokiki ua tau fuafua po o le a le sa’o po o le a le sesē. Ua tatou iloa e tele le ‘oa i tu masani i A’oa’oga i āgafeso’ota’i Katoliko, ma tatou te iloaina ua vala’auina i tatou e galulue mo le Lelei Laua’itele. E masani o le faigatā masani

o le fa’alogoina o ni a’oa’oga e feso’otai manino ai ma ē filogia ma fa’aoga lelei. O le Fonotaga a le Vatikano Lua na vala’auina ai le Ekalesia ina ia va’ai mo ‘fa’ailoga, ae lē o taimi’ ma fa’auigaga. O se vaega lenā o le pule o a’oa’oga a le Ekalesia ma le au fa’aliliu telosia ua tu’uina atu i ai le fa’atuatua-ga. Ae ui i lea, o se vaega mo le au fa’atuatua atoa e sa’ili ma faia e pei ona fa’alogoina ua fa’atua-lagaina ma fa’ailoaina. A o fa’alogologo le au fa’atuatua i nei faitauga o lenei vaiaso e tatau i tagata ta’ito’atasi ona maitauina po ofea o aga’i i ai le lu’itau a Amosa i le asō ma fa’atasi atu ma Paulo i lana vala’u ia tatalo mo latou i tofiga pule i mea o lo’o feagai ai. Mo tagata ta’ito’atasi fo’i ina ia tauivi ma le fa’ata’oto o le lē faimea tonu, ma fuafua pe fa’apefea ona fa’aogā tupe, ‘lenā mea pisia’, e pei ona fai mai ai le evagelia. E pei ona masani ai o tusitusiga pa’ia e mana’o iā i tatou ina ia faia ni galuega lelei o ni Kerisiano, ona o le uiga lenā o le avea ma so’o.

ASO 25 SETEMA ASO SA 26 TAUSAGA MASANI:

Faitauga muamua: Amosa 6: 1, 4 – 7. Matua: O ē ta’o’oto i o latou moega ma pepese, e tafea ai nei i latou.

Salamo: 146: 6 (tali), 7 – 8 (tali), 9 – 10 (tali). Tali: Lo’u agaga e, ia e vivi’i atu i le Ali’i.

Faitauga lona lua: 1 Timoteo 6: 11 – 16. Matua: Ia e taofi lenei poloa’iga se’ia o’o atu i le fa’aali mai o lō tatou Ali’i o Iesu Keriso.

Aleluia, Aleluia...Le Ali’i e, ia e tatalaina o matou loto ia naunau i afioga a lou Alo...Aleluia.

Evagelia: Luka 16: 19 – 31. Matua: Na e maua au mea lelei i lou olaga, na maua fo’i e Lasalo o mea leaga; a o lenei ua fa’aolioliina o ia, a ua puapuagāina oe.

Tofitofiga o le Upu:

Tatou te fa’aauau pea ona mulimulita’i i fa’amatalaga a Luka i a’oa’oga a Iesu i fa’ata’oto, ma o le tasi lenei o se isi fa’ata’ita’iga matagofie o lenā ituaiga o fa’amatalaga na fa’aoga e Iesu e fa’amatala ai le uiga o le avea ma se tasi o le malō. O se tala ua manino lelei lona āta toe lu’itau. Ua fa’amatala mai o le ali’i mau’oa e la’ei toe taumafa lelei – ae lē o ta’u maia e sauā, fa’aoleole pe taufa’ase’e fo’i. Atonu tatou te manatu i nei mea, ae o Iesu e lē ta’u maia iā i tatou o lona tu’ua’iga na afua ile tele o mea; pau le mea tatou te fuafuaina sa ia lē maitauina o le tagata mativa i le faitoto’a o le pa. Atonu sa lē lelei, ae ua tatou iloaina sa ia lē popole i ai. E masani ia Luka ona a’oa’i le au mau’oa i lana evagelia, ona e foliga mai e mau’oa. E tatau ona fa’apopoleina ai so’o se isi e faitau i le evagelia o lo’o ola lelei ma le mafana. Ae o le autū o lenei fa’ata’oto o le lē iloaina e le mau’oa o mana’oga a le au matitiva. E lē o ni mea ua faia e le mau’oa ua aumaia ai o ia i Seoli, a o mea sa ia ave’eseina. Na fa’amanatu e Aperā’amo iā ia o le aga’i atu i le amio lelei (Mose ma perofeta) o lo’o mafai ona maua e tagata uma ma le mulimulita’i i ai e lē o se filifiliga mo le tagata. Amio lelei e lē o se mea e mafai e isi ona aga’i i ai ma le loto a o isi e lē amana’ia. O le mafuaga lenā e tatau ai i Kerisiano – ma faia – faia ni auala e gaiōi ai mo le faimeatonu ma vala’au i isi e faia fa’apea. O Lasalo o lo’o ta’oto i le faitoto’a a le ali’i mau’oa, o le lu’itau i le au fa’alogologo o le maitauina – ma gaiōi – e pei ona tatau ai.



FAITAUGA MO LE ASO SA MUAMUA O OKETOPA

Aso 2 Oketopa Aso Sa 27 Tausaga Masani:

Faitauga muamua: Sapakuka 1: 2 – 3; 2: 2 – 4.

Matua: O lē ua amio tonu e ola ia i lona fa'atuatua.

Salāmo: 95: 1 – 2 (tali), 6 – 7 (tali), 8 – 9 (tali). Tali: O le aso nei afai tou te fa'alogo i lona si'ufofoga, 'aua ne'i fa'ama'a'a o outou loto.

Faitauga lona lua: 2 Timoteo 1: 6 – 8, 13 – 14. Matua: 'Aua e te mā i le molimau i lo tatou Ali'i.

Aleluia, Aleluia...Le Ali'i e, ia e tatalaina o matou loto ia naunau i afioga a lou Alo...Aleluia!

Evagelia: Luka 17: 5 – 10. Matua: Ananafi ua tusa lō outou fa'atuatua.

20

Aso Sa muamua	09.00am	Seatoun	Patele Taisali
4 Setema 2022	11.00am	Titahi Bay	Patele Taisali
	11.00am	Porirua	Patele Andrew
Aso Sa Lua			
11 Setema 2022	12.00	Te Awakairangi – Lower Hutt (Taita & Lower Hutt)	Patele Taisali
Aso Sa Tolu			
18 Setema 2022	11.00am.	Newtown	Patele Taisali
	11.00am	Holy Family	Patele Andrew
Aso Sa Fa			
25 Setema 2022	11.30am	Te Wairua Tapu - Wainui (Wainuiomata & Petone)	Patele Taisali
	11.30am	Stokes Valley	Patele Maleko

Mikaele Teofilo:

✉ m.teofilo@wn.catholic.org.nz

☎ +64 4 496 1707

☎ 021 0818 5037

✉ PO Box 1937, Wellington 6140, New Zealand